

Zo Mite Thu

Zo a kici minam pen a kip le a tuomprien ngaina nei in Chin gamhuom, Kawlgam sunga teng minam khat ahi hi. Zo mite pen Tibeto-Burman kici minam huomsung pan a namke khat hi a, Tibet gam muolsangah pu le pate na teng ngai hi, kici hi. A kigensawnsawn tangthu om bangin Pu Zo pana pieng minam hi a, tua ziehin Zo minam kici hi. “Zo” ci kammal in mun le muol po genna min hiloin, pienna pupa min talangsah zaw hi.

Mangkangte (British) hun lai in, Kawl gam pen India’ gamke khat in kiciemte a, Kawl gam in 1948 kum in suohtatna ang nga ciengin India tawh gamgi ang kibawl in, Zo mite tenna laizangah gamgi kikhen a, tua ziehin, tuhun in India le Kawl gamah kikhen in teng uhi.

Zo mite pen Chin gamhuom sunga teng minamte ahi Falam, Hakha, Tedim, Matupi le Mindat cite sungah khat ahi hi. Tam minamte lahah, Zo mite tuompienna khat in, ngaina tuom le tatzie le zahzie tuom nei uhi. Zo ham pen telha kisa in Tedim le Tonzang huomsunga om minamte in zong hamsa sa uhi.

1962 kum in, Zo mite in ngaina pen biehna tawh kepcing zawh nadingin Tedim Baptist Association pansa in puosuoh khie in, Association tuom in ding uhi. Tam thu in Zo mite in a tuomprien, amahaw kamham le ngaina tawh Pasien suohta tah in bieh theina piengsa hi. Myanmar Baptist Convention in Zo Baptist Association pen 1972 kum in kipsahna nei hi.

Tua banah, Zo Baptist Association in lungdamna thu kizel nadingin, “Diamond Year Mission” kici gammiel nasepna Kawlgam sungah sem in mi sawl khie hi. Zo Christian College kici Lai Siengtho Sang zong kiphut in mailam a gammiel sunga Pasien’ nasem makai dingte kipantah hi.

Gam tuomtuom ah hamsatna kithuoh hitamaleh, Zo mite in a tuomprien ngaina le zahziete Pasien upna sungah zunghlaa sah in ki kemcing hi. Zo tangthu, Zo tangmi le Zo ngaina late kihilsawnsawn in Chin gamhuom sunga a om minamte lahah tua a tuomprien minam kimmelcinate kikem hi.

Zo Baptist Association sungah, ngaina gougil kepcing banah, Jesu’ itna hlakhietna nasep kistem ahi ziehin angtan huoi mama hi. Zo Baptist Church Adelaide in ka ngaina le ka kamham tawh nuomtah a Pasien biehpiehna ka neina vuah, nang zou nadinguh muohna lienpi tawh kang hlan uhi.